

LIS PREDICJIS DAL MUINI

di pre Josef Marchet - Udin, 1965

Chê volte des bombis

Doman, nuie messe culî; ma ben miercus che al e Sant Josef e al è ancje l'aniversari dal bombardament di Gargagna. Si impensaiso di che di? Si podeve restà ducj cadavars, se i svoladons no vessin vude tante premure di discjariasi e no vessin molât il sbit dusinte metris masse in là. Ducj cadavars: che culî nissun veve fatis farcadicis sot tiere par là a parasi, nissun sintive cjampanis e sivilots a visà dal pericul, nissun si rompeve cuant che al comparive par aiar cualchi trop di corvats. E invezit nus e lade ben, co la vin suiade cu la sbigule.

Lade ben cu la vuere, si sa po! Massime par Florean Baduscli che al à podut, doi mes dopo, rifilâ ai americans dute la zonte che al veve inte cjanive; massime par Checo Ramot che al à podût fasi la cjase cui carantans dal marcjât neri; massime pe Vera de Gnoche che; dopo tornâts a cressi i cjavei, e a podût contentâ un reziment di aleats; massime pal fi di Menat che al à vude plene la cjase di orlois, di machinis par scrivi, di bicicletis, di argagns di ogni fate... vignuts ju pal cjamin, che si sa!

Brave int a Gargagna! In che di a batevin i dincj a rumiavin Gloriepatris, a tiravin ju ducj i sants dal paradis: e passade la fufe a son tornâts in presse ai lor bieî trafics, cuntune ande, cuntune sigurece, cuntune muse di bande che e faseve la biele voie.

Po ben, che si distrighin lôr cun Chel parsore, che al à simpri timp e mût di clamaju a fà i conts: fin che si a flât intai polmons, la partide no je mai sierade. Jo o soi vieli: o ai viodût par agns e agns, tal bearç dal Ros Blasut, il plui biel cocolâr di dute la Furlanie; e une sere o soi passât e nol jere plui nuie, che il folc lu veve ardût.

Sant Josef che nus vuardi di mâl! Lis busis des bombis tal prat di Cumugne lis vin taponadis; e je tornade a sverdeâ la jerbe e no si impâr nuie altri. Lis busis de animate a son plui duris di incolmà: cualchi diaulin al à di jessi platât da fonts... Cui rive adore di disnidalu?

O jeri daûr, vuê di buinore, a cuinça il vignâl, e i cjâfs des vîts, par ordin che ju cjonçavi cu lis fuarfis, mi vaivin in man: daûr di chês lagrimis a vegnin i butui, daur dai butui a vegnin lis cecjis, cul non di Diu, a vegnin i raps. A son dome i omenats che nol zove nuie cjastiaju, che no cognossin ni Vierte ni Sierade par fa cualchi fregul di ben.

Al ven a stai che, almancul voaltris, che o seis culî usgnot, e chei altris cuatri galantoms che a son restâts di semence in chest paisât bastart, o

vignarêš dal sigûr, miercus cu ven, a ringrazià Sant Josef, che nus a travuardâts a peste, fame et belo. E cun cheste us doi la buine sere.